

# Asisko gutuna

2016ko iraila. 3. printzipioa. Eguneroko bizimodua: kanporantz, elkartasuna

95. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Sarri beldur izan ohi gara Jainkoarekin aurrez aurre jartzeko, agian ontzat hartuak izateko beharrak ez digulako onik ematen edo agian geure irizpidez begiratuak izateko beldurrez. Baina Jainkoari errukiak aurre hartzen dio. Gure artean ere maitasunak guztia dezakeela, guztia barkatzen duela baldin badakigu, zer egingo ez ote du Jainkoaren maitasunak?

## Gogoetarako gaia

### *Nork bere buruari barkatu*

Barkamenaz mintzo garenean, ia beti besteei barkatzeaz ari gara edo bestela besteei niri barkatzeaz; baina, zer dago nik neure buruari barkatzeaz?

Agian sentitzen dugu, ez dagoela geugan ezer barkatu beharrekorik; edo agian baditugula aurre nola egin edo beraiekin zer egin ez dakigun gauzak eta gertaerak, hartu ahal izan ditugun erabaki ez zuzenak, beste batzuei kalte egin ahal izan dienak ... Pentsa dezakegu guztiak gaintituak daudela, baina noizik behin berriro agertzen dira gure bizitzan.

Neure buruari barkatzeak zera esan nahi du: neure historiari begiratu utz diezaiokedala neure buruari perfektu ez izaten, onar dezaiokedala ez ditudala bete bizitzan neure buruari jarritako ideal eta helburuak, utz diezaiokedala neure buruari hutsegiteak egiten berehalaxe neure burua ziritu beharrik gabe, eta hala ere egin dudala ibilaldi bat neure bizitzako bidean, zeinetan neure historia bere

zuri-beltzean onartzen dudan, berorrekin ba-keak egiteko eta onerako izan dela ikusteko.

Neure buruari horrela barkatzeak lagundu egingo dik besteei barkatzen, eta askatasuna emango beste harreman libreago eta irekiago bat eduki ahal izateko. Perfektu ez naizela aitortzeak, eta hala ere neure burua, den bezalakoa, maitatzeak eta onartzeak, ireki egiten nau besteen hutsegiteak erraz eta ulermenez onartzeko gauza izango naizen harremanetara.

Ahalegin gaitzke, orobat, geure buruari Jainkoagandik barkatzen. Hark barkatzen ditu gure zailtasun guztiak, gure bekatua, are guk geurez barkatu ezin dugun hura.

Maitasuna eta barkamena beti ematen digun Jainko errukitsua zain dago gu Harengana egunez egun hurbil gaitzen, guk geure buruari barkatzen irakasteko, eta mundua gure inguruan gizatiaragoa eta errukitsuagoa egingo duen begirada solidarioa guri emateko.

## Bibliako pasarteak: 1Ko 4,1-5

Beraz, har gaitzatela denek Kristoren zerbitzaritzat eta Jainkoaren asmo ezkutuen administratzailetzat. Eta administratzaileari eskatzen zaiona leiala izatea da. Niri dagokidanez, gutxi axola zait zuek edo giza auzitegiak epaitua izatea. Neuk ere ez dut epaitzen neure burua. Egia da neure kontzientziak ez nauela ezertan salatzen; baina horrek ez du esan nahi neure burua errugabetzat dudarik, Jaunak bainau epaitzen. Ez dezazuela, beraz, epea baino lehen epai. Itxaron Jauna etorri arte. Berak argituko du ilunpean ezkutatua dagoena, berak agertuko bihotzeko asmo gordeak. Eta orduan, nork bere merezia jasoko du Jainkoarengandik.

## Frantziskotar espiritualtasuna

Egun batez, hainbeste mesede egin zion Jaunaren errukia miresten ari zela, bere eta beraren anaien bizibideak izango zuen bilakaera ezagutu nahi izan zuen Jaunagandik, eta otoitz-leku batera joan zen, maiz egiten zuen bezala.

Luzaroan egon zen han, beldur-ikaraz, mundu osoaren Jabearen aurrean. Barruko samintasunez gaizki igarotako urteak gogora ekarriz, hitzok errepikatzen zituen: *Ene Jainkoa, erruki zaitez bekatarari honetaz*. Poliki-poliki, halako poz esanezinekoa eta gozotasun neurrigabea bihotz barnera isurtzen zitzaiola sumatzen hasi zen.

Gainera, bere senetik kanpora sentitu zen, eta bekatuaren beldurrez bihotzean pilatu zitzaizkion sentimendu itogarri eta ilunpeak uxaturik, bekatu guztiak barkatu zitzaizkion ziurtasuna eta Jaunaren grazian bizi zen konfiantza eman zitzaion barnean. Orduan, kordea galdurik, gora jaso eta halako argi batean guztiz bildua, bere barruko begirada zabaldurik, garbi ikusi zuen etorkizunean gertatuko zirenak. Gozotasun hura argiarekin batera desagertu zenean, espiritu berriz jantzita, beste gizon bat bihurtu zen.

## Otoitza

Zoriontsua Jainkoak hobena kendu eta bekatua barkatu diona!

Zoriontsua,

Jaunak errurik egozten ez diona!

Isilik egon nintzen bitartean, jota nuen gorputza, egun osoan aieneka.

Gau eta egun gainean nuen zure esku gogorra, indarrak makaltzen ari zitzaizkidan, udako sargoritan bezala.

Orduan, aitortu nizun bekatua, ez nizun gorde errua.

Hobenak zuri aitortzea erabaki nuen, Jauna, eta barkatu zenizkidan erru eta bekatuak.

Otoitz egin biezazu, beraz,

fededunak, larri denean:

uholde handia izanik ere,

ez du harrapatuko.

Zu niretzat babesleku: arriskutik gordetzen nauzu,

askapen-kantaz inguratzen.

Sal 32,1-7

## Gutuneko azken hitzak

“Gizakia hazi egiten da belaunikatzen denean.” (Alessandro Manzoni)

2016ko iraileko eguneroko Ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate iraileko erreferentzia guztiak:

1 Lk 5, 1-11	7 Lk 6, 20-26	13 Lk 7, 11-17	19 Lk 8, 16-18	25 Lk 16, 19-31
2 Lk 5, 33-39	8 Mt 1,1-16.18-23	14 Jn 3, 13-17	20 Lk 8, 19-21	26 Lk 9,46-50
3 Lk 6, 1-5	9 Lk 6, 39-42	15 Lk 7, 36-50	21 Mt 9,9-13	27 Lk 9, 51-56
4 Lk 14, 25-33	10 Lk 6,43-49	16 Lk 8, 1-3	22 Lk 9, 7-9	28 Lk 9, 57-62
5 Lk 6,6-11	11 Lk 15, 1-10	17 Lk 8, 4-15	23 Lk 9, 18-22	29 Jn 1, 47-51
6 Lk 6, 12-19	12 Lk 7, 1-10	18 Lk 16, 1-13	24 Lk 9, 43b-45	30 Lk 10, 13-16

Geure web gunea bisitatu

[www.asissarea.org](http://www.asissarea.org)




Asis Sarea

646 21 48 96

Iraileko otoitza 29an izango da